



# Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail: tiryimym@gmail.com

TAPAK 8

Yangia anidakangma :



Tir Yimym



tir\_yimym



tir yimym

TAPAK 3

**Carlos Alcaraz taküm French Open masayatetsü**

**Rajnath-i German nung submarine yangludak ka semdang**



VOL. XXIII ISSUE NO. 192 (ADOK 192) DIMAPUR AMUNGNÜ (SUNDAY) RONGCHII (APRIL) 26, 2026

₹ 5.00

## Mon district nung ULFA (I) züngsem 3 apu

Dimapur, April 25, 2026 (TYO): April 24, 2026 nü Nagaland kübok Mon district nung sepaitemi ULFA (Independent) züngsem asem puogo.

ULFA (I) telungpurtem ya Phomching area nung inyaksangshia aru aser Shangnyu yimtsüng leni aodang apu ta osang angazüker.

Osang tejangja angazükba sülen Assam Rifles sepaitemi Phomching sub-division kübok Shangnyu yimtsüng anepdang 2:00 ako meta mita ao.

Idangji AR sepaitemi ULFA (I) züngsem asem apu. Parnok ya Tezpur nungi Lieutenant Gajendra Asom (35), Jorhat nungi Lance Corporal Brojen Asom (27) aser Golaghat district nungi Sergeant Puhor Asom (26) nunger ta jangjaogo.

Gajendra Asom-i 2011 nung, Brojen Asom-i 2022 aser Puhor Asom-i 2029 nung ULFA(I) nung aden ta ketdangsurtemi ashi.

Par asem ket nungi grenade pezü ngutetogo ta ketdangsurtemisa ashi.

## Manipur sorkari COCOMI dang langzür

Imphal, April 25, 2026 (Agencies): Manipur sorkari tanü Coordinating Committee on Manipur Integrity (COCOMI) ajanga akhangba onüktem asoshi telangzüba agütsüogo.

Honibarnü COCOMI-i Manipur state ajungalen lungkak aitba sentong ka ayonga agia liasü aser iba sülen pamoki sorkar nem onük tenet aliba memorandum ka agütsü.

COCOMI-i ayongzüka agiba sentong nung lungkak aitertemi Chief Minister'er bungalow keni aotsü merang. Parnoki kin o kin tsüngda rara aser tawa Tronglaobi bomb lendong dak sendakba onüktem asoshi lungkak ait.

Honibar anüngdang 1:00 ako meta Chief Minister Yumnam Khemchand-i COCOMI teshimtet nübotem den ajurutepe senden ka amen aser parnoki agütsüba memorandum agizük.

Iba sülen tanü nikongdang Chief Minister's Secretariat nung osangbener senden ka amendang Home Minister Govindas Konthoujam-i COCOMI nem telangzüba agütsü.

COCOMI-i peaceful rally alitsü aser April 23 nü Khongjom Day mokdangtsü lemtetba sorkari meteta lir. Sorkari COCOMI den jembishinütsü atema jaok saka parnoki maru ta Konthoujam-i ashi.

COCOMI-i Manipur nung "proxy war" anentsü akhangba atema minister Konthoujam-i "iba onük nung tekümdangtsü tulu keta lir aser India sorkari lisopurtem kümzüka ayutsüba nung temulung agütsür" ta ashi.

COCOMI-isa narco-terrorism samatsütsü takhangba agütsüba atema Konthoujam-i "2029 tashi nung Centre-i Northeast nung kiralongraba anendaktsütsü sentong metetdaksüogo" ta langzü.

Tanga tesemtem nunga

Naxalism anendaktsütsü atema mapa inyakdar aser Manipur dena Northeast ajungalen nungi kiralongraba agientsü ta paisa ashi.

"Tronglaobi bomb lendong aser Ukhrul district nung TM Kasom anasa amakba tatalokba anaprong National Investigation Agency (NIA) ket nung agütsüogo. NIA-i Honibarnü Tronglaobi lendong atalokdak ano semdangogo aser Chief Minister-i NIA dang iba tatalokba süoki ia agitsü aser tekaratiba nung temeten agütsütsü mepishiogo" ta Home Minister Konthoujam-isa ashi.

"Sorkari internally displaced persons (IDPs) tekaraba nung pei talidaki yoktsü atema inyakdar. Tanga state tem nung election duty atema Central Armed Police Forces kar anienba aser Tronglaobi lendong ajanga iba maparen nung tetsükdaktsü ajurur. Ajisüaka relief camps semdangba aser nübortem den olemtepa confidence-building measures maneni inyakdar" ta paisa metetdaksü.

Pei talidak toktsür aortemi security tebilemstütem ajanga nungnanger, kari meyipa onür aser sorkari tensa kanga junga repringdar ta Konthoujam-isa ashi.

COCOMI-isa Suspension of Operations pact (SoO) agientsü akhangba atema Konthoujam-i ashiba agi "state sorkari iba onüktem atema teti jembir aser Assembly nunga benokogo. Ajisüaka iba agreement nung Centre densema lir asünung state sorkari dangbo tatembang lemtet magiteter" ta ashi.

National Register of Citizens (NRC) mapa tenzütsü akhangba Home Minister-isa "Centre aser state sorkartemi ozüng alema aruba noktangtsü aser kuli tejangja maliba nisungtem meyipa yoktsü mapa tenzükogo" ta metetdaksü.

## Nagaland nung Veterinary sector akangshitsü jembii

Kohima, April 25, 2026 (TYO): Nagaland nung shi peria mangur aser nungdakba nungi 44.5% ang anguba agi meat imports nung Rs 263.56 crore tema endoker.

Honibarnü "Veterinarians: Guardians of Food and Health" omen nung ajemdaker World Veterinary Day amungdang iba tebilemstü lemsatop.

"Nagaland nung shi peria manguba ya tayongzüka tulu dang masü saka ano veterinary sector ajanga rural economy ajungkettsü asoshi maongka tulu ka lir" ta Commissioner & Secretary of Land Revenue, Tourism, & Census Operations Director Dr Chusi-i ashi.

Dr Chusi-isa veterinary professionals dang meranga inyaktü aser yimdaklir ajungkettsü aser rongsenketzüng renlokdaktsütsü atema shilem agitsü ayongzük.

"Itasen teimtiba angurtem rongnung veterinarians dena lir anungji nenok lemzüka mapa dak alia inyaktüla aser talisa yimtsüngtem nung temulung agütsütsüla" ta pai ashi.

African Swine Fever ama

tashidaktem ajanga takoksa jenti ajurur aser department-i mapang shitak nung inyakba aser kuli agütsüba ajanga Centre nungi Rs 1.29 crore teyari nguogo ta Dr Chusi-isa metetdaksü.

"Veterinarians ya chiyungtsü aser temang anema ayutsü atema tanükertem lir" ta Secretary to the Government of Nagaland, Angelina Tajen-ia ashi.

"Nübortem asoshi food chain nung veterinarians ya teküzmükertem ama lir aser nenoki shi o shi ajanga yangluba chiyungtsütem kümzüka ayuba den tashidak balala noktanger. Nenok mapa ajanga tachirtem aser lokti kümzüka ayur" ta lai ashi.

"Animal aser human health sendaktepa lir aser rabies o Nipah amala shiruru tashidaktem meimchir dak menateper. Anungji vaccination drives, disease surveillance aser One Health inyakyim ya public health measures atema kanga tongtipang lir" ta Angelina-isa metetdaksü.

Veterinary services ajanga yimdaklirtem yarir aser shiruru metsüba ajanga aluyimer nem

financial security agütsür. Deworming, artificial insemination, aser farmer training ajanga sensaktia nungi ajungketer aser rongsenketzüng indaktsür ta laisa ashi.

"Veterinarian temi shiruru, public health, aser lipoküm asoshi inyaker. Veterinarian tem ya 'silent guardians' lir aser chiyungtsü tajung agütsütsü asoshi mapa inyaker" ta Nagaland Veterinarians' Association President Dr K.N. Zubemo Humtso-i ashi.

"Veterinarians-i shiruru tashidaktem anema rarar aser One Health maparen inyaker. Anungji medical aser environmental professionals den sentaktepa inyaktüsbaji kanga nungdaka kümogo" ta Dr Humtsoe-isa ashi.

Iba sentong nung Animal Husbandry & Veterinary Services Director Dr Kyochehebi Swirie aser NSVC President Dr Simon Ao natia o jembii.

Sentong nung mendenji Dr Tolto Metha liasü, Dr H. Inato Jimomi-i temoatsü meshia sarasadem aser Dr Vikuolie Mezhasu-i anküp tepela o jembii.

## Kuki telungpur nem Indian Army uniform agütsü

Imphal, April 25, 2026 (Agencies): Manipur nung Indo-Myanmar arrtsülen mapa lemzüka aliba Indian paramilitary forces-i Kuki telungpur teloktem nem uniforms agütsü ta tai tongloksür.

April 24, 2026 nü Ukhrul kübok Mullam yimtsüng anasa arishi küm 29 tain Naga Village Guard züngsem ka khasetba sülen iba ken o adokogo.

Mullam anasa Naga village volunteer amaktsü atema Assam Rifles-i military uniforms asema Kuki narco-terrorists yari, kümzüka ayu aser meina senzü

ta Khanuithot-Khon (Voice of the Naga Youth)-i metetdaksüogo.

Naga volunteers-i telungpurtem indang maitsü chichiba jungkai adoka sayuogo. Telungpurtemi taila uniforms semer liasü aser parnok den khatepdang parnok Indian Army uniforms semer liasü ta Voice of the Naga Youth-isa ashi.

Anungji Indian paramilitary forces-i Kuki telungpurtem den tesendaktep aliba kulitem jangjatsü atema jungjunga bushisüngdang asütsüla ta Voice of the Naga Youth-isa takhangba

agütsüogo.

Iba tatalokba khukhua aitsür aser Kuki telungpurtemi Indian Army uniforms anguba aser raraba tesemtemi anir aruba indang osang tejangja metetnür. Iba mapa inyakba commanding officers maitsü jangjatsüla aser ken o benoka angadangtsüla ta parnokisa ashi.

Voice of the Naga Youth-isa Centre sorkar aser Kuki teloktem tsüngda sign sütepba Suspension of Operations (SoO) agreement agientsü atema takhangba agütsüogo.

## Centre-i Nagaland nung IIT ka lapoktsü mulunga lir

Dimapur, April 25, 2026 (TYO): Nagaland nung higher educational infrastructure akangshitsü atema Lok Sabha MP Supongmeren Jamir-i asüngdanga liasü aser iba atema Dr. Sukanta Majumdar, Minister of State for Education & Development of North Eastern Region, Government of India nungi telangzüba ka agütsüba nung Centre-i mulunga agizükba shia lir.

December 4, 2025 nü Parliament nung Zero Hour mapang Supongmeren-i iba onük benoka jembii aser idangji pai Nagaland nung IIT ka lapoktsü

indang shia liasü.

Nagaland nung IIT ka lapoktsü temepishiba ka January 1, 2025 nü ngua agizükogo aser iba asoshi tarutsü anogotem tongtepretepa aotsü ta pai ashi.

India sorkari tang ya rejutem akangshitsü aser ulushitsüba den National Education Policy (NEP) den putepa multidisciplinary aser high-quality education ajungkettsü meranger ta Dr. Sukanta Majumdar-i langzüba nungsa shia lir.


Külen, Pradhan Mantri Uchchar Shiksha Abhiyan (PM-USHA) kübok 2023-24 nungi 2025-26 tashi Rs. 1,292.16

core mulunga agizükogo aser iba scheme ya higher education nung access, equity, aser excellence asoshi temulung agütsür ta Dr. Sukanta-isa ashi.

Ano, Rashtriya Uchchar Shiksha Abhiyan (RUSA) kübok Nagaland nung mapatong 39 mulunga agizükogo aser item mapa asoshi Rs 254.06 crore endoktsü aser iba nung central share Rs 229.57 crore dena lir ta paisa ashi.

Maneni, PM-USHA kübok March 25, 2026 tashi nung Nagaland nem central share Rs 130.46 crore agütsüogo ta Dr. Sukanta-isa metetdaksüogo.

# 'Advent of Christianity in Nagaland- from tradition to transformation' kaket sayaogo



'Advent of Christianity in Nagaland- from tradition to transformation' kaket sayaba noksa nung angur.

**Dimapur, Rongchii/April 25 (TYO):** 'Advent of Christianity in Nagaland- from tradition to transformation' nungja agütsür kaket ka Honibarnü International University, Chümoukedima nung Advisor, Law and Justice, Land Revenue, T N Manen-i sayatsüogo.

Iba kaket ya Professor (Dr.) Priyaranjan Trivedi aser Professor (Dr.) Zavise Rume nati zülu aser kaket 21 nungi volume mezüngbuba alitsü.

Iba sentong nung jembidang, kaket ya talisa Naga nung litsüi Baptist missionary tem Tsüngrem o bener tribal nisungtem Khristan

kumdahtsüsü atema aitba dak sendakba lir, ta ashi.

Iba kaket yagi Naga nung tongmelang takum aser süng-long külema aliba nungi anüolen alirtem teyari nung Khristan yimsü dangi meypdaksüba indang lir.

Iba kaket tajung asoshi kaket zülurtem nem pai tenünsang agütsü aser ibai shisatsü meimer asoshi rongsen jenti aliba kaket ka lir ta ashi.

Kaket zülur Professor (Dr.) Priyaranjan Trivedi, shiba International University indang founder Chancellor lir, pai ashiba agi, Nagaland-i Khristan yimsü aruba ya theological tsütsü

tatalokba ka kistung masü saka loktiliba aser sobaliba temelenshi ka liasü.

Itemji bendenba ajanga onoki kaketshirtem dang puti otsü tamendak dak akumtsüboba ajanga terenlok alir ta sayuner.

"Onoki tesüiba otsü rizüngtsü kistung atema iba kaket mezülü, saka tarutsü asoshi compass agütsüsü atema zülu," ta pai ashi.

Chancellor, International University, Nagaland, Dr. S Pande-i iba kaket sayaba ya takok tuluka lir aser puti otsü ya zülutsü temulungtetba aser tasü tait mulungsentsü melira tangola o ka dang lir, ta ashi.

## Peren nung World Malaria Day amung



Peren nung April 25, 2026 nü World Malaria Day amungba sentong nung Chief Medical Officer, Peren, Dr. K. Limatula Ao-i jembidang tangokba noksa ka yangi angur.

**Dimapur, Rongchii/April 25 (TYO):** Peren district ajunga nung April 20-24, 2026 anogotem ramen nungi jembua alitsü atema State NVBDCP totuyuba nung ajemdaker "Driven to End Malaria: Now We Can. Now We Must" kübok World Malaria Day munga liasü.

Item anogotem kibok sema vector-borne disease indang awareness agüja, item tashidak nungi jembua alitsü aser azioktsü indang nüburtem dang sayua liasü.

Long Lasting Insecticidal

Nets (LLINs) tim yimya nung amshiba kibok sema repranga jajaba den ramen agi temang metabang angati tendanga liasü.

Iba campaign ya District Programme Officer, Dr. Caroline T (DPO-CDS 1) lenisüba kübok NVBDCP Peren staff temi anir inyaka liasü.

Shishilempaba tesemtem aser migrant workers aliba tesemtem densema merila tali apokba aser alidak tesemtem nung Special Awareness Camps aser Mass Screening

Activities ayongzüka liasü.

Iba den külema Community Health Officers (CHOs) aser danga Health Workers temi pei inyakba health units tem nung awareness sentong ayongzüka fever tendanga Village Health Nutrition and Sanitation Day (VHNSD) munga liasü.

Iba district level inyakyim ya April 25, 2026 nü temdanga District Headquarters nung World Malaria Day munga liasü.

Iba sentong nung tesemdang tongti ama Dr. K. Limatula Ao, Chief Medical Officer, Peren aden aser lai World Malaria Day indang o jembu.

Lai iba sentong nung jembidang ramen nungi jembua alitsü asoshi bendanga agütsür inyaksü nungdakba, kera tashidak tendanga putetba aser temang anepaluba nung temulung agütsüsü indang jembu.

Laisa iba anogomung omen dak rangloker jembidang, ramen samadaksüsü asoshi linük nung nungdakba hadir, shisatsü aser tasa lir, anungji itemji shidak amshitsü ayongzüker, ta ashi.



OFFICE OF THE  
**Changtongya Students' Union**  
P.O. Changtongya -- 798613, Dist. Mokokchung, Nagaland  
Regd. No.908  
"To Achieve Destination"

### TENÜNSANG AGÜTSÜR




**Kr. Imliyangerla Longkumer**

**Kr. Akumtola Jamir**

Changtongya Kaketshir Telungjem-i taküm küm 2026, NBSE ajanga agiba HSLC tatidang nung Wb. Moatoshi Longkumer aser Wt. N.Tainla Jamir na jala Kr. Imliyangerla Longkumer, Little Star Hr. Sec. School, Dimapur nungi HSLC Top-13 (95.83%) Aser Wb. Temjenjungba Ao aser Wt. N. Amongla na jala Kr. Akumtola Jamir, Christian Standard Hr. Sec. School, Changtongya nungi HSLC Top- 20 (94.83%) Jenjang nung takok tulu ngutetba asoshi tenünsang agütsür.

Iba den külema ano CKT züngsem kwikati HSLC aser HSSLC tatidang nung takok nguogo, nenok ajak nem CKT mendenti ajanga tenünsang agütsür.

Tsüngremi nenok taküm aser shisaliok wadang maneni moajangma.

Sd/-  
**Sb. AKUMDONG,**  
TIR, CKT.

Sd/-  
**Kr. TIAZUNGLA,**  
TONGTI TEZULUR, CKT.

## Chümoukedima nung HomeLane studio lapokogo



Honibarnü Chümoukedima nung Retd. Chief Engineer K Sale-i HomeLane showroom semzüka mapang tangokba noksa nung angur. HomeLane yagi modular kitchens, wardrobes aser ki ajunga interior solutions agütsür.

**Dimapur, Rongchii/April 25 (TYO):** India nung technology aser AI amshiba home interiors brand tajung rongnung ka ta züngshiba HomeLane indang Northeast India nung mezüngbuba studio Chümoukedima nung lapokogo.

Regional markets nung HomeLane alitsü tasa nung ibai tongtipang mera ka alitsü, kong organized, design-led aser technology amshia ki telung yangluba meilongi ainba mapang lir.

Iba studio ya Thejangulie Sale-i aniba M/S Buildsworth Enterprises den lungjemer lapok. Iba studio lapokba sentong

nung jembidang, ki kiburtem design tali tejangjaba meteta akumer aser kilung tajung bushir, ta Thejangulie Sale-i ashi.

HomeLane den lungjema ajanga onoki local expertise aser technology amshia design yangluba bener arutsü aser customers nem indang-indanga ki telung tajungba yanglutsüsü, ta pai ashi.

Co-Founder and COO, HomeLane, Tanuj Choudhry-i iba sentong nung jembidang, ibai Northeast India nung mezüngbuba alitsü aser region nung onok inyakyim ulushir asünung ibai tongtipang market ka lir, ta ashi.

## DGC nung Study Group ka tenzüko

**Dimapur, Rongchii/April 25 (TYO):** Dimapur Government College indang Career Guidance Cell ajanga civil service aser danga sendaktepa aliba services nung nukjidong ayuba kaketshirtem asoshi study group ka April 24, 2026 nü tenzüko.

Rongsenketzung jenjang mejungi aliba kaketshir temi coaching agitsü makoker mesüra competitive exams atema renemba nung kaketshir longpak maliteter aser graduate masüdag civil services asoshi renem tenzüksü nungdakba ajiteta College-i iba project ya

tenzüko. Lanur graduates aika competitive exams ya graduation sülen ang angateter, aser iba mapang parnok küm ka mesüra tali amajok nung indoker alir.

Anungji kaketshirtem competitive exams asoshi renemshiba nung yimya sübadaksüsü aser college nung training teperi agüja kaketshir indang mapang tajung aser rongsen kumzüksü tangatetba nung DGC-i iba mera ya agi.

Iba ya ajanga kaketshirtem graduate asüdag parnoki janraba dangi mera ka anasa orr alitsü.



RMLCF Tobacco-Free Campaign Phase IV takok ngua April 24, 2026 nü Kevillhouü Rio Auditorium, G. Rio School nung agiogo. Iba sentong nung school 20 (government school ana aser private school 18) nungi kaketshir 369 aser tesayur 35 arua shilem agia liasü.



April 25, 2026 : Gas supply dak sendakba nung tetsükdaktsü adoker aliba mapang Dharamshala kübok McLeodganj Chowk nung cylinder bena aliba delivery truck ka nungi sen agütsür LPG cylinder agizüksü atema nürurtem aritepa aoba noksa nung angur.

### Mamata Banerjee-i Amit Shah anema legal ken o ka benoktsü

**New Delhi, Rongchii/April 25 (Agencies):** West Bengal Assembly elections tanabuba shilem magi tsungda Chief Minister Mamata Banerjee-i Honibarnü, lai Union Home Minister Amit Shah-i nürurtem amokmerena jembiba atema legal ken o ka benoktsü ta shiogo. Hoogly nung sentong ka nung o jembiba mapang Banerjee-i, "Amit Shah-i nürurtem amokmerena jembiba atema pa anema onoki legal ken o ka benoktsü. Home Minister ka ama pai iba amala o mejembitsüla," ta ashi. Hokolbarnü Shah-i election tembangba sülen TMC kübok inyaktertem langkoshishi sendaka

ayutsü ta ashiba atema Banerjee-i pa aitsüba sülen legal ken o benoktsü ta ashi. Laisa, BJP-i tashiyim benshitsü amokmerenba yagi Bengal nung voter tem atsüa martutettsü, ta ashi. "Home Minister-i kechi amala oshi amshir? election tembangba sülen nürurtem langkoshishi sentaka ayutsü ta ashiba ya agizüksü makok. Iba amala tebilemba bener lira nenoki Bengal kodanga makoktsü," ta lai ashi. Hokolbarnü Shah-i, TMC party indang "goons" tem anema jenjang tesashi agitsü ta ashi. Arambagh nung lokti senden ka nung o jembiba mapang Shah-

i, 29 nü Arambagh nung alirtem nem timtem agütsüra ketdangsurtemi May 5 nü jenjang tapet agitsü ta ashi. "Ni didi indang goons tem dang 29 nü pei kidangi nungi madoktsü tekümdangtsü metetdaksür. 29 nü Arambagh nung alirtem nem timtem agütsüra May 5 sülen onoki parnok langkokshishi sentaka yur metongshitsütsü," ta pai ashi. Assembly elections mezüngbuba shilem Brehostibarnü 6 ako nung tembangogo. Iba election nung voter shilem 91.78-i shilem agia liasü, ta Election Commission of India-i metetdaksü. Election tanabuba shilem April 29 nü agitsü aser vote ya May 4 nü azüngtsü.

### Rajnath-i German nung submarine yangludak ka semdang

**New Delhi, Rongchii/April 25 (Agencies):** Defence minister Rajnath Singh-i Kiel nung German company ThyssenKrupp Marine Systems' (TKMS) indang submarine yangluba facility semdangogo, kong pa nem advanced naval technologies aser capabilities indang metetdakja liasü. Iba rong yangluba facility semdangba mapang German defence minister Boris Pistorius-i pa meina oa liasü. India-i sen lakh crore 1 alang Project-75 India (P-75I) programme tembanga renemtsü atema anasabai aoba mapang Rajnath-i tang iba tesem ya

semdangogo. Iba Project kübok Mazagon Dock Shipbuilders Limited (MDL) nung advanced submarines trok yanglutsü aser iba atema tangalen nungi technology bener arutsü. Iba programme nung shilem agitsü imlartem rongnung TKMS ya temaba jenjang nung lir aser parnoki advanced air-independent propulsion (AIP) systems keta aliba submarine tem agütsütsü, koba ajanga submarine tem tzu telung nung mapang talangba litettsü aser tangar nem meputetdaksüi senzusenpongsü asoshi jenjang tajungba kümdaktsütsü. X ajanga Rajnath-i iba tesem semdangba ajanga tangazükba

aika anguba lemsatopogo. Paisa, iba facility nung technological advancements aser operational capabilities tem indang lemsatop. Pa Type 212 class submarine ka nung tua mena iba submarine indang capabilities tem sayua liasü. Singh-i ashiba agi, iba ajanga ajak ajangzüksü koba Indo-Pacific nung geopolitical jenjang melenshiba mapang kanga tongtibang lir. Iba tesem semdangba ajanga naval systems aser shipbuilding amala tongtibang defence sector tem nung Europe nung aliba linüktem den longjemer inyaktsü atema New Delhi-i jenjang taliba agiba sayur.

**Office of the**  
**AO RIJU**  
MOKOKCHUNG : NAGALAND - 798601  
"Kenozülü Yinsem"

Ref.No. AR/SD/2024/25 Date: 25-04-2026

## SANGDONGER

Ao Riju-i achaayanga agiba Arangtet Tatidang 2026 mezüngbubaren Rongchii 28-30 tashi Mokokchung (Model Hr. Sec. School, Arkong) aser Kohima (KABA. Chandmari Fellowship, S.S Hall) tesem nung agitsü. Admit Card Mokokchung tesem nung agütsütsüpur Rongchii 27, 2026 anogo Ao Riju office nungi angutsü aser Kohima tesem nungi agütsütsüpur tatidang agitsünep tuko ako tesadang (9:30) nungi angutsü.

Sd/-  
**I. Temjen Tzudir**  
P/H & Co-ordinator, Ao Riju.

### BRS toktsüba sülen K Kavitha-i party tasen ka tentetogo

**New Delhi, Rongchii/April 24 (Agencies):** Taoba mapang Telangana chief minister K Chandrashekar Rao (KCR)'er jala Kalvakuntla Kavitha-i, Telangana Rashtra Sena (TRS) ta nungja agütsür political party tasen ka tentetogo aser iba ajanga la tebui aniba Bharat Rashtra Samithi (BRS) nungi pilaba sayur. Medchal district kübok Munirabad tesem nung la pusemertem aika adenshia lia Kavita-i party tenüng, wako aser agenda tem metetdakja liasü. Source balala ajanga ashiba agi, Kavitha-i 'TRS' acronym ya amshinüa liasü, koba Telangana maitsü atema raraba aser tejangraba aser state ken o dak tera yangloka lir. Iba sentong nung adentsü atema Telangana kübok district 33 nungi la pusemer 50,000 shi adenshia liasü. Iba sentong ya Telangana movement nung tongtibang lenir Professor K Jayashankar tenüng nung jatsüba ground ka nung agia liasü.

Kavitha ya la indang NGO Telangana Jagruthi den sendaktepa lir, iba NGO yagi Telangana state atema nokdangba mapang tongtibang shilem agiogo, aser iba telok ya political party ka akümsü akok ta bilema liasü. Ajisüaka Telangana Rashtra Sena party sangdongba ajanga iba ken o ya jangjaogo. 'TRS' acronym meyipa agiba ajanga teburi toktsüba ka Kavitha-i tanaben meyipa agiba jangja jangja sayur. Telangana Rashtra Samithi (TRS) nungja ya party tir-i 2022 küm Bharat Rashtra Samithi (BRS)-i melenja liasü. Kavitha-i 2025 küm September 3 nü BRS aser MLC ka ama inyaka aliba tokja liasü. Party anema inyakba atema la suspend sütsüba sülen lai party tokja liasü. La tebu KCR aser adianu KT Rama Rao (KTR) na nungi pilaba ya joko teti atema asütsü ta bilemer. Kavitha-i ashiba agi, Telangana indang regional nükjidongtem ataloktsütsü atema TRS ya tentet.

### AAP Workers temi Harbhajan Singh'er kima longkak ait

**New Delhi, Rongchii/April 25 (Agencies):** Aam Aadmi Party (AAP) worker tem aikati cricket asayar aser Rajya Sabha MP Harbhajan Singh'er kima adenshia pa BJP nung adenba atema longkak aita liasü. Parnoki par ki jara nung "Gaddar" (tashioktsür) ta zülutsü. Raghav Chadha, Sandeep Pathak, Swati Maliwal, Harbhajan Singh, Rajinder Gupta, Ashok Mittal aser Vikram Sahney ta AAP Rajya Sabha MP teneti party toktsüba sülen Punjab nung mepetmesü adoker lir aser iba anema party nung inyaktertem aser lenirtemi taittsüba balala agüja arudar. Arvind Kejriwal-i aniba Aam Aadmi Party (AAP) atema takoksa tulu ajangshia Rajya Sabha MPs Raghav Chadha, Sandeep Pathak aser Ashok Mittal nung Hokolbarnü AAP toktsür BJP nung denogo. Hokolbarnü osangbenertem den sensakemba mapang Chadha-i, Upper House nung AAP MP two-thirds shi pa den aotsü asoshi renema lir ta ashi, koba taoba Delhi Chief Minister

Arvind Kejriwal-i aniba pary asoshi takoksa tulu asütsü. "Rajya Sabha nung AAP züngsem 2/3rd-i Constitution of India nung agüja aliba provision amshia BJP nung adentsü telemtetba agiogo," ta Raghav Chadha-i ashi. Osangbenertem den sensakemba mapang Rajya Sabha MP yagi Kejriwal-i aniba party aitsü, shirnoki ochi mashi anema raratsü nangzükter Delhi nung sorkar kümteta liasü, parnok ochi mashi kümogo, ta ashi. Arishi küm 37 tain Chadha ya party tenzükba mapang nungi Kejriwal den inyaka aruogo. Pa ya chartered accountant ka aser pa mezüng India Against Corruption movement tatembangbuba shilem nung Kejriwal den sendaktep aser iba mapang political party ka tentettsü atema sensakema liasü. Iba sülen pa ya AAP nung tongtibang lenir ka aküm aser arishi küm 26 dang asüba mapang national otongdar aser national senyur aküm.



April 25, 2026: New Delhi kübok Laxmi Nagar tesem nung electric transformer ka nungi mi adoka iba temeket nung aliba kitem dak kongshiba sülen ketdangsurtemi iba tesem asadanga noksa nung angur. Iba lendong nung nisung 14 kümzüka liasü.



## TIR YIMYIM YIMOBILEM (EDITORIAL)

DIMAPUR SUNDAY, APRIL (RONGCHII) 26, 2026

### Tsüngremi mamatettsüsa inyakba

**A**senoki Tsüngrem dang meimba aser amangbaji Pa tsüngdangbo kanga tilaka asütsü amai bilema alitsü akok. Ajisüaka, asenoki Tsüngrem pelatsüsa mapa tilaka inyakba mesüra tenla tilaka agütsüba ajanga Tsüngrem kanga pelar aser ibaji Pai teti bilemtetter. Aji oda, asenoki Yisu dang meimba ajanga alima mesama tashi asen tenüng mamatsüsa Paibo inyaker. Yisu joko alima shi taküm tembangtsü anogo mapang anasa aruba mapang ka, kenü Pa Bethani nung zütsüra aketer Simoner kidang mena alidang, tetsür kati sen jenti alangba teronem menemba toztü bener arua Pa kolak nung mezütsü. Atangji, tetsürla jagibo Yisu anogo ananü lir külen aputsü aser Yihuda nungertemi Pa südaktsütsü aser ano anogo asemnü lir Pa shia arutsü ta memeteti liasü südi. Ajisüaka, idakji alirtem dang Yisui ashiba ama, Pa mang aremtsü anogo anasai arur asünungji jelia tebu Tsüngremi iba tetsürlaji Yisu mang renemtsütsü yokba liasü ta angatetter. Tetsürla jagi Yihuda nunger puti ungertem aser tezülurtemi bilemba shisatsü aser sentong kecha memetet. Lai ka dang meteta lir, ibaji Yisui Kümtetdakba aser Tsüngrem chir. La tamangji kanga tongmelang saka takang. Aji oda, lai Yisu meim, anungji Pa nem sen aika alangba jenjang teronem menemba toztü bener arua tekolak nung mezütsü. Lai iba ama ya Yisu arishirtem jashidaktsütsü asoshi mienyak, mesüra la nüngtugu akümtsü asoshia meinyak mesüra Yisu nem la nüng sangdaktsütsü asoshia meinyak. Lai Yisu kolak nug teronem menemba toztü mezüba jagi lai Yisu meimer ta kuli asü. Iba mapang lai o mejembi, sayutsüngi masü, sayatenya mapa meinyak, lai tangari meinyaktetba mapa balaka meinyak, saka Yisui bo la mamatsüsa aser putusa putu alima mesama tashi la bilemtettsüsa la jak ajiok. Tanü asenok nisung tsütsü bilemdi asübo, Yisu nungi langka nüngdak aginüba agi toztü sen jenjang aika alangba la kolak nung bener oagi mezütsür südi ta bilemla. Ajisüaka, iba tetsürla mulungjang nung Yisu nungi aginüba dang nungibo Yisu nem agütsünüba tuluba liasü, ibayongji lai akokba tajungtiba agütsü aser ibaji kodanga mamatsüsa Yisui ajiok. Asenok asoshia koma amala mapa ka inyaknung dang mesüra tenla kwi aben nung dang Yisui kodanga mamatsüsa ajioktsü amai bilemer. Abrahami par jabaso ka dang aliba Tsüngrem nem tarongba tenla agütsütsü mekoru, menungnang mesüra par chir melen tanga tajung ka tenladi ta memepishi. Iba anogo Tsüngremi Abraham alima otsü nung kodanga maidoktsüsa moatsü. Iba ama tamang aser temulungjang Tsüngremi aginür. Tsüngremi asen mulungjang repranger aser asen mulungjang ajunga agi Pa meimba mapa agi sayudang Tsüngrem pelar aser alima mesama tashi asen senmang alitsüsa aser asen nüng mamai bilemtettsüsa Pai inyaker. Aji oda, Mark tapu 14 nung tetsürlai Yisu meimba mapa agi inyaka sayu ama, anogo shia asenokia asen taküm yimya aser mapa agi Yisu meimba temaitsü tangar tsüngdang sayutsü nüngdaker.

## OLEMSABANG

### Theology zünger Tsüngrem tenzüksü nangzükba

L. Kika Pongener

(Yashi adok nung...)

Tsüngrem tenzüksüji pei sasa tajaba tejangja angateter dang nangzüktsüla. Tanü asen lima nung arogotem nung tenzüker aika jaklaliru yimya agi Tsüngrem tenzüker ama azüoka aser asüngteta melitetba angudang kanga sasar.

Hau-niii....Tsüngrem tenzüker asüyonga ajakbo küsa masü....Tenzüker aika pei tajaba tejangja meteter, bendanga agütsüba aser sempet tajung aketba tenzüker aikasa lir-ko....Item tenzükertemji angudang kanga nukshia apayua repranger. Lanur shirnok Theology zünger Tsüngrem tenzüksü janngar....Parnok ajaki tamasa pei sempet angatettsüla; aser tsürabur-ia pei jabaso-jala dak aketba sempet angateter dang züngdaktsütsüla. Kechiyung tajaba aser sempet mangateti tenzükra; pa/la-a kanga tim-atemtsü; aser nubur asoshia tajangzük masütsü. Tanü lim arogo karbo telung nung kangasa tim-ateмба jembia angazükba....Toklang tenzüker karbo; Degree-bo tulu-lu zünger; sempet-bo tajung aika dang keta lir sernung....Arogo tsüzüng-ozüng küpok melinur; ajemalua tila mekümnur; pei madak lennir küpok melinur; külem tenzüker den putepa meliteter; pei-i mulungba dang inyaker; temetongshitsüba maginur aser tangar nungi shisatsü magir....ta kanga tim-ateмба angazük. Ano lim arogotem nung toklang tenzüker karbo; pei tenzükra arogo jenjang mangateti pei ajung asa-a; 'High level' nung janngadema dang tenzüknuba karbo alitsü sudi. Aji oda, Khristar arogo rongsenji tim lenmang nung, lalushipong mesui, ochishia kanga züngkanga ketdangsua amshitsüla. Ano lim arogotem-ia pei arogo tashi yari toklang tenzükertemji kangabo tim-metemdaktsü ayutsüla. Aji oda, Tsüngrem tenzüker ka dak sempet tajung aika liaka; tajaba aser shimtetba mangateti tenzükra; aser jaklaliru yimya tazüokba melira;...Pa/la tenzükra ajanga arogo nung tajangzük agütsüba dang nungibo....timtem, petsaperong aser mepetmesu atokdaktsüba-ang tuluba asütsü.

Tanü lim arogotem nung arogopur aikati taginuba jembia angazükba....Toklang tenzükertema kümsuk (Term) lateta ayutsüla....ta jembir. Tang tashi lim arogo ajak nung toklang tenzüker kodang tasoba küm-60 mesura küm-65 jungdir; sodi agütsütsü....ta arogo inyakyim nung lateta ayur; saka kümsuk (Term)-bo lateta mayur. Ajisuaka, joko putu tensa den apet kümsuk (Term) lateta ayutsüla ta jembir; aser arogo kar nungbo lateta ayuba-a angazükogo. Hau-niii....arogo aika nung toklang tenzükertem; küm kopika talangba tenzüker; yamaji ajemalua tila kümer, arogopur tenuk sunga, temulung chia, bendanga agüja tenzüker aikasa lir-ko. Ajisuaka, tenzüker ajak küsa masüji....ashiko, arogo kar nungpo, tenzüker kar agibo, odi-odia meshitet, telung nung kanga timtema alitsü sudi. Aji oda, kodang küm talangka tenzükdir....lia-lia arogopur rongnung tanak-temesung bendanga meteta akümer; koma alinung sadem-sadema alitsü (?) Iba tasaji kanga junga meteta akümer; arogopur tsüngken metsübu akümer; arogo tsüzüng-ozüng küpok melinui akümer; arogo inyakyim aser rongsen madak kibur akümer. Nisung'er yimya agi chiyungtsüa shi-ango agia teti chira lakteter; aser antsü (Egg) nunga teret chiteter. Akhi putu nung laishir aika maliba mapang ama-to masü; jokorla, tanübo laishir takotet aika atoka lir....Anungji küm talanglang tenzükdaktsüba inyakyim yabo joko melenshitsüla ta arogopur aikati jembir.... Kechiba arogopurtemi yamaji jembir (?) Ashiko, toklang tenzüker karbo küm aika tenzükdang nuburi laktettsüsa tenzüka alitsü sudi.... Anungji toklang tenzüker ajaki nuburi melaktettsüsa kümdanga tenzüksüla.

Asen Aotsür Aor dak aketba tashimait kaji; tema nungpo menurema tenungsangteptsü; saka kipok nungpo kati ka tilu-panglua nungsen jembir. Anungji meshitak sernung shitak-a ta....majung sernung junger ta....anemsu agi tenungsangtepba ya melenshidi.... Nungsen metsübu indang-indanga metongshitepdi....ta asünungdang asen Aor yimden, arogo, mungdang aser loktiliba ajak ajungtsü aser melenshitsü. Tanü putu nung shirnoki indang-indanga metongshitsür; parnokjibo aikati kanga sempar aser maginur; saka kari nungsen magira asen lokti ya majungtsü. Tsüngrem tenzüker ajak dak akettsüba jakla tajungtibaji; ochi, ajemalu, tesungjem, jaklaliru azüoka litetba aser taküm asüngteta litetba....itemji asütsü. Tsüngrem tenzüker atema Degree tulu azüngba aser shia-metetba (Skill) dang nungipo jaklaliru ya tongtipangba lir. Ano aji dang masü, tajaba aser shimtetba angateta tenzüksüla....Tajaba aser shimtetba mangateti tenzükra; pa/la mapa agi tajangzük agütsüba dang nungipo; timtem agütsüba-ang tuluba asütsü. Tsüngrem tenzüker kaji tangar asoshi temettsüdaktsü lung ka masütsüla. Tsüngrem tenzüker shiba sudir suang....Na ajanga Khristar arogo timtemdaktsüra; Tsüngrem tsüngdang aser arogopur tsüngdang khuret tulu asütsü. Na ajanga arogo timtemdaktsübaji....Yisu Khrista temang nung timtemdaktsür ta angatettsüla....Kechiyung arogoji Khrista temang lir (Efesa-1:23). Anungji Tsüngrem tenzüksü nangzükba ya pongpa-pongpar masü; saka kanga ret-ret agitsüla aser tajaba angateta tenzüksüla.

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**

## Central Java nung tekülem kidang auyaba bushisüngdang



Mount Sinai Full Gospel Bethel Church, Tamansari District, Central Java nung aliba arogo ka nung inyaker kati police dang par tekülem kidang April 21 nü auyaba indang rasaa ashiba noksa nung angur.

**Jakarta, Rongchii/April 25**

**(Agencies):** Central Java nung tekülem agiba tesemtem nung security tebilemstü tali akumba mapang iba province nung Protestant arogotem dak tenük yoker ki o jen rakpoka auyaba indang Indonesian police temi bushisüngdangba mapang lir.

Taküm February ita nungi tenzüka Mount Merbabu tenemtsüng len Getasan subdistrict nung aliba tekülem ki asem kakkpoka lir.

Merapi-Merbabu mountain range nung aliba Mount Sinai Full Gospel Bethel Church, Tamansari nunga April 21 nü iba ama ataloka liasü.

Iba tekülem kidang tekülem mapang amshiba guitars aser keyboards densema auer temi musical instruments, amplifiers aser speaker ama audio equipment tem auya, aser bushisüngdang temi tatalokba balala sendaktepa ali mali ta asadanger.

Director of General Criminal Investigation Kombes M. Anwar Nasir-i iba bushisüngdang nung provincial police temi local units tem yarir ta ashi.

"Item tekülem kidang auyaba bushitetsü atema Criminal Investigation Directorate-i asadanger," ta pai April 24 nü sangdong ka nung ashi.

Item tekülem kidang surveillance systems mali, anungji police temi tenük kuli alir aser kiyong nung CCTV footage tem reprangtsüsa akumer, ta Nasir-i ashi.

"CCTVs maliba tekülem ki nung item ya inoktsü aser inoka alirtem mapa shidak inyaka ayutsü ajungshir," ta pai ashi.

Mezüng auyaba osang ya February 7 nü Christian Church of Central Java North, Tajuk village nungi aru. April 8 nü Methodist Church of Indonesia, Batur village nung anaben atalok aser April 14 nü Bethel Church of Indonesia, Sumogawe village

nunga atalok.

Aibelener temi anüngdang tekülem kidang shinga maliba mapang auyar amai ajiteter, ta Getasan subdistrict police chief Agus Pardiyono Marinus-i ashi.

"Tekülem ki tem shibanga ayur. Anungji item mapa inyaker temi kishi aser windows lapoka aliba repranger," ta pai ashi.

Central Java police-i tekülem ki temeket nung tali tajungba miittsü atema arogo lenirtem community security groups, local civil defense units tem den amalitep tenzüko ta ashi.

Central Java nütsüng yongsük million 38 aliba nung Khristanpur shilem asem lir.

2024 küm Indonesia nung tamangba yimsü nung aibelena ainyaksangshiba tatalokba balala 662 liasü, aser yangji tekülem ki raksatsüba, shibangtsüba, amokmerenba dena lir, ta SETARA Institute for Democracy and Peace-i ashir.

## Arogo leniri tamangba yimsü benjong nung fireworks mamshitsü ayongzüker

**Thiruvananthapuram, Rongchii /April 25**

**(Agencies):** Kerala state nung aliba Oriental Orthodox Church tekolakbai par nütsüngtem dang arogo benjong nung rongsen jenti lalushibong masütsü aser makamaiter aser nüngdakbapur ang yaritsü ayongzüka liasü.

April 21 nü Thrissur district nung benjong ka alitsü lia firecracker factory ka nung mi adoka apokba lendong nung nisung 14 asü aser 25 shi yiruba sülen India nung aliba Malankara Orthodox Syrian Church tekolakba Catholicos Baselios Marthoma Mathews III-i iba tayongzüka ya agütsü.

"Benjongbentsü mapang iba ama temulung shirangtsü lendong tanaben mataloktsüsa asenok shisa kaa inyaksangshitsüla," ta pai April 23 nü sangdong ka nung ashi aser nüburem dang khen atema pelateptsü mechi tai maket takum bendanga agütsü asü ta pei mulung nung asüngdangtsü ayongzüker.

"Fireworks agi Tsüngrem mepelar, saka tamanger indang mulungjang asüngteta aliba agi ang pelar," ta Catholicos-i ashi aser yimsü balala amangba nüburtem dang tamangba yimsü dak sendakba benjongbentsü nung alakya benjongba nung

kanga shisadangtsü ayongzüka liasü.

Kerala ya küm shia temple aser Church feasts aliba nung nüngtugu lir, kong fireworks ya teti amshir.

Iba state nung tekülem ki meyririjang aika lir, kong küm shia benjongbentsü mapang fireworks kisüng nung sen billion 15 indoker, ta Deccan Chronicle osangkaket ajanga 2016 nung ashi.

Ajisüaka state nung arogo temi parnok dak sendaktepa aliba annual feasts aser fireworks nung sen kwi indoker, ajibo data tejangja mali.

Catholicos-i tamangertem dang benjongbentsü nung amshitsü yua aliba senotsü ya senotsü agi timtemer yariba nung amshitsü ayongzüka liasü.

"Nüngdaka alirtem nem ki sütsüba nung iba amala senotsü amshitsü asoshi asenoki lenmang bushitetsü. Asenoki iba ama telemtetba ka agitetra, ibaji tepela tulu alitsü," ta pai ashi.

Pai iba ama inyakyim nung yariteptsü mulunga agizük aser pai ashiba ama inyakba mezüng arogo pongu nung tongmelang agi annual feast benjongba nung shilem agitsü ashi.

"Asen arogo tekolakbai asen arogo nung tongmelang agi tetetzü lia tanüla tzüra

temdakja benjong agitsü ayongzüka onoki pela agizüker," ta arogo ka nung trustee Ronny Varghese-i ashi.

Arogo leniri tamangba yimsü ajunga dang asen tamangba yimsü benjong nung bendanga agütsü tongmelang agi amungtsü ashir, ta Varghese-i UCA News dang ashi.

"Sen million aika jenjang fireworks sayuba dang nungibo yasa-tzura alir nem achi-ajemtsü agütsüba mesüra talidak ki malir nem ki yanglutsüba tajungba," ta pai ashi.

Kerala nung aliba private firm ka nung executive, Noby Sebastian-i ashiba agi, Catholicos-i ashiba ya Arogo benjong mapang kisüng masü saka asenok anogoshi takum libaliru nunga inyaksü nüngdaker.

"Asenoki tzü baptiba, holy communion mezüngbuba, tasoba anogomung aser kiyimba sentong tongmelang agi ayongzüktetsü aser rongsen sayuba yimya mamshitetsü, koba state nung ajaki inyaker," ta Catholic nung Sebastian-i UCA News dang ashi.

Pai Catholicos tasü ita nokdakba tenüng asang aser "Iba yagi tanüla ainba nung yaritsü," ta ashi.

## ANOGO ABEN TSÜNGREM DEN

### TIMTEM NUNG TAMANG

*Khrista shibai ni tashi itdaktsür pa dak ni ajak invaktsü okok. ~Filipi 4:13*

Ignatius ya Antioch nung Bishop ka liasü. 107 AD nung Rom chuba Trajan Antioch-i aru, aser amangbapurtem dang parnok tamangba yimsü tokjang mesüra tepseta intoktsü ta ozüng agütsü. Ignatius-i kechi südir süaka Khrista kodanga metoktsütsü ta ashinung, pa Rom nung tepset.

Kecha agia masetshidaktsüba tamang, oda rishikangshi tulu mapang nung tamang yutetba iba arogo lenir dak angur. Pai arogopurtem dangi züluba shititem nung Khrista temang nung lungjemtsüba aser pei tamangba asoshi rishikangshiaka talangka aremzüksü indang ajungshiba asenoki angutsü. Pai pa asübaji tamakok masü saka Khrista asoshi kuli asütsü maongka ta agizük.

Asen taküm nunga asen tamang jenjang anokshidaktsütsüsa mapanga ajurur. Iba ama tensa mapang nung Tsüngrem dak temulung lemtetba, aser tamang mongjen nungi masetshi-i noktaksü Ignatius indang taküm otsü nungi asenoki angazüker. Mapang ajak nung asenok ajungtsü asoshi, aser Pa sentsüwangshi asoshi Tsüngremi inyaker ta amangtetsü merangdi.

### SARASADEM:

Alima tashi koktetsü aser tamang jenjang meraksai ne den jajatsü nai ni tanü yariangma. Amen.

## ZBCK tetsür temi Operation Salvage Rehabilitation Centre semdang

**Dimapur, Rongchii/April 25**

**(TYO):** Zeme Baptist Church, Kohima indang Women Department-i aruya aliba Golden Jubilee benjongmung nung shilem ka ama April 25, 2026 nü Operation Salvage Rehabilitation Centre, Heningkunglwa aser Senior Citizen Home Ngwalwa semdanga liasü.

Advisor, Women Department, ZBCK, Adauna Zeliang-i tayongzüka o jembidang centre indang administration-i bendanga agütsü inyakba atema tenüngsang agütsü aser iba ministry ya Tsüngrem yimli asoshi tajaba tajungtiba rongnung ka lir ta ashi.

Lai yangji alirtem dang taneptsü anguba tesem nung aliba ya temoatsü lir ta ashi aser yimya tajung amshia teimla nung alitsü ayongzüka liasü.

Laishiba nungi tayongzüka o lemsatepdang, Tsüngrem ya timtem nunga alir, tashi maiter

nem tashi agütsü aser taneptsü agütsü, ta Zeliang-i ashi.

Recovery ya temesepba chiyongtsü nungi nüji anguba kisüng masü saka Yisu dak takum tasen anguba lir, ta ashi.

Lai parnok dang Tsüngrem dak tamang akatsü, teimla ayutsü aser Tsüngremi samar aliba tanaben agütsütsü sentong lir ta amangtsü ajungshia liasü.

Iba sentong nung Peihau, Chaplin, Operation Salvage menden liasü aser yangji alirtemi Operation Salvage anthem aten.

Women Department-i "Kneel at the Cross" ken aten aser kijai atenba ken ka Peheuyina-i tena liasü. Iba sülen sentong tembanga Pauleu Liegise, Associate Pastor, ZBCK ajanga sarasadem.

Iba outreach nung shilem ka ama parnoki Ngwalwa nung aliba Senior Citizen Home semdanga yangji teintet rogotem den külemi sarasadema senotsü aser nüngdakba oset lema agüja liasü.

**AO OSHI ANGAZÜKDAK:****TANÜ ANGAZÜKTSÜBA OJANG**

Tir Yimyim

**Yakanüba**

(n) yakanü sür taoba anogo, anogo ana ogo ( a couple days before)

\* Yakanüba onok medemertem senden ka agia liasü.

**Yakyaka**

(v) tekara. Jeretperet aketba (smarter amd quicker)

\* Asen kin lanurtem yakyaka lira tangar ajateta otettsü.

**OLONG PAITEP # 7485**

	1		2			3		4		5
6								7		
					8		9			
			10							
11										
				12						
13		14		15						16
17										18

**TIPLIN**

1. Inyaker ajangtetba - (3)
3. Bangsemo adokdak - (5)
6. Shitak mesüi inyak - (7)
7. Ya mimong nung angur - (3)
9. Reprangzük - (4)
10. Tasola - (5)
11. S \_\_\_\_\_ - (4)
13. Yagi ajak ashioktsür - (3)
15. Ki aokba oset - (7)
17. Ak shi nung inokba tasen - (5)
18. Ishika - (3)

**LANGTSÜNGLEN**

1. Meshidak - (3)
2. Tanaben soshir - (7)
3. Iba anogo - (4)
4. Meshi - (3)
5. Yagi mi tsükloker - (9)
6. Shi tapu ka - (9)
8. Yagi ayimer saka ozü masü - (3)
9. Ajokba shiruru ka - (7)
12. Inyaket - (4)
14. \_\_\_\_ hi - (3)
16. Akümüli nungi pilar - (3)

**OLONG PAITEP # 7484 TELANGZÜBA****TIPLIN :**

1. Ayaterm, 7. Anünü, 8. Aiben,
10. Kiralongrar, 13. Nükla,
16. Arong, 17. Süngpak.

**LANGTSÜNGLEN :**

2. Yangji, 3. Tinu, 4. Mapa,
5. Tembar, 6. Shiner, 9. Hon,
10. Kangki, 11. Rakzük,
12. Ajunga, 14. Anis, 15. Trog.

**NAI-A YA METETTER**

Canada nunger Antoine Moses-i ghonda 24 tsüngda süngdong teimtiba atemba alima otsü yangluteta lir. Antoine-i July 17, 2021 nü La Crete, Alberta, Canada nung ghonda 24 tsüngda süngdong 23,060 atem.

**Agartala Press Club-i security meshir**

Agartala, April 25, 2026

(Agencies): Agartala Press Club-i Director General of Police Anurag den ajurutepa state nung journalist asoshi security akangshitsü aser press stickers tim mesüi amshiba onüktem lemsatetep.

"Onok managing committee-i DGP Anurag den media personnel dak kongshiba onüktem lemsatetepogo" ta Press Club president Pranab Sarkar-i ashi.

"Onoki Tripura kübok hills aser plains nung journalists asoshi security meshiogo. Tesem kar nung journalists makogo aser onoki item mapa inyakterem aputsü atema shiogo" ta pai ashi.

"Tripura nung press stickers tim mesüi amshir anungji bangdakpurtemi aibelenertem merenshitsüla. Maneni, mongpu ajak asoshi specialised press jackets agütsütsü mepishiogo talisa iba ya aonung tesü inyakba photojournalists asoshi kanga nüngdaker" ta Sarkar-isa ashi.

Agartala Press Club-isa Agartala aser tanga sub-divisional towns nung police patrolling talila inyaksü ayongzükogo.

Külen, content creators ta shia nisungtemi social media nung osang tai prokshir anungji police-i iba mapa ya azüoktsüla ta parnokisa metetdaksü.

Agartala Press Club tenüing nung Vice President Chitra Roy aser Joint Secretaries- Kamal Chowdhury o Abhishek Dey nungeri DGP Anurag den ajurutep.

**OFFICE OF THE MOKOKCHUNG SENSO MUNG DANG**

MOKOKCHUNG VILLAGE

**TENÜNGSANG ASER TETUSHI AGÜTSÜR**

Mokokchung Senso Mung dang office ajanga **Kr. Lipoklemla Jamir**, D/o Wb. Bendangtoshi Jamir, NBSE kübok 2025-2026 HSLC tatidang nung top 19 jenjang nguteta senso sanger nem khonang tetushi tulu bener arutsü nung yimer yimsanger ajak tenüing nung tenüingsang tulu lemsatetep.

Teyanglur Tsüngremi ne tazüingba wadang nung ajungketa moajangma.



Sd/-  
**L. Kari Kichu**  
President, MSM

Sd/-  
**T. Lipokyanger Pongen**  
Secretary, MSM

**MULUNGNEN O**

**July 15, 1937 - April 20, 2026**

Onoki teti meima aliba asür **Alikala Tzüdir**, wife of Medangchiba (Molungyimsen). Shirang dang aser iba alima toktsür aodang, ana aser talang nungi medemer, yimer-yimsanger, Arogo aser lokti palala temi, nübu, rongsen aser Sarasadem agi nungita yariba atema kanga pelar.

Tsüngremi nenok ajak maneni moajangma.

~ *Temeim kinungbu, chirnurtem aser semchirtem.*

**GOVERNMENT OF NAGALAND**  
**DIRECTORATE OF WOMEN RESOURCE DEVELOPMENT**  
**NAGALAND:: KOHIMA.**

NO.DWRD/DEV/MTC-4/2021

Dated Kohima, the April 2026

**ADVERTISEMENT**

The Department of Women Resource Development invites female applicants who are willing to undergo training under the following trades during 2026-27.

**A. 1.Cutting & Tailoring: under Multi Training Centre (MTC) Kohima**

1	Course Duration	May 2026 – February 2027 (8 Months)	Intake Capacity
2	Eligibility Criteria	Class VIII Passed Age : 18-35 (as on 30 <sup>th</sup> April 2026)	30

**2. Knitting : under Multi Training Centre (MTC) Kohima**

1	Course Duration	May 2026 – February 2027 (8 Months)	Intake Capacity
2	Eligibility Criteria	Class VI Passed Age : 18-35 (as on 30 <sup>th</sup> April 2026)	10

**3. Baking & Confectionery : under Multi Training Centre (MTC) Kohima**

1	Course Duration	May- August (3 Months)	Intake Capacity
2	Eligibility Criteria	Class X Passed Age : 18-35 (as on 30 <sup>th</sup> April 2026)	10

**4. Hairstyling : under Multi Training Centre (MTC) Kohima**

1	Course Duration	May- August (3 Months)	Intake Capacity
2	Eligibility Criteria	Class X Passed Age : 18-35 (as on 30 <sup>th</sup> April 2026)	10

**B. 1. Cutting & Tailoring: under Multi Training Centre (MTC) Dimapur**

1	Course Duration	May 2026 – February 2027 (8 Months)	Intake Capacity
2	Eligibility Criteria	Class VIII Passed Age : 18-35 (as on 30 <sup>th</sup> April 2026)	15

**2. Knitting : under Multi Training Centre (MTC) Dimapur**

1	Course Duration	May 2026 – February 2027 (8 Months)	Intake Capacity
2	Eligibility Criteria	Class VI Passed Age : 18-35 (as on 30 <sup>th</sup> April 2026)	5

**NB:**

1. Last Date of Submission of Applications in all the Categories : 8th May 2026
2. Date of Interview : 12th May 2026
3. Time of Interview : 10:30 AM onwards
4. Commencement of Classes : 14th May 2026
5. Venue for Interview: (i) Kohima - Multi Training Centre (MTC) Bayavü.  
(ii) Dimapur - Multi Training Centre (MTC) Purana Bazaar.
6. Application shall be received on first come first basis in the intake ratio of 1:3 in each course.

Applications addressed to the Director, Women Resource Development in plain paper stating bio-data, 2 (two) recent passport size photos, self-attested copies of the relevant mark sheet, birth certificate ST Certificate and any other relevant documents are to be submitted to the Officer-in-charge at the Multi Training Centre (MTC), Bayavü. Contact No. 7005658092.

For Training under Multi Training Centre (MTC) Dimapur, Applications are to be submitted to Officer i/c MTC, Purana Bazaar, Dimapur. Contact No. 8787869227.

Sd/-  
**(VILONE SAKHRIE)**  
Director.

# Mali nung telungpurtemi tesem balala amak: Army

**Bamako, Rongchii/April 25 (Agencies):** Mali nung telok balalai linük yimtiba capital Bamako densema tesem balala makogo, koba telok balala tsüingda tangatetep nung inyakba ama reprangteter, ta army-i ashi.

Army-i Honibar anepdang ashiba agi, parnok kiralongrar teloktem den raratepdar, shirnoki Bamako aser linük kübok tesem balala nung army barrack tem makogo. Mali ya tang army yimsüsüba kübok lir.

Honibar anepdang 6 ako nung Bamako tezülen Mali indang military base tongtiba,

Kati nung bomb ana apok aser iba sülen khatepa liasü.

Kasa mapang tsüingda Severe jila, Kidal jila aser northern Mali nung Gao yimti nunga ibala mesükba lendong ataloka liasü.

"Tesem ajak nung khatepdar," ta tenük kuli agütsür kati Reuters news agency dang ashi.

Bamako nung Associated Press osangbener-i, Modibo Keita International Airport anasa prangbong tulu aser automatic rifle amshia khatepba osang agütsüogo. Kasa mapang nung helicopter kati iba tesem temeket meita oa liasü.

Mali ya hon aser mineral

balala aika adokba linük ka lir aser parnok küm aika telungpurtemi timtem agüja arudar. Linük nung tesem balala al-Qaeda and ISIL (ISIS) den sendaktepa aliba teloktemi maka arudar. Maneni linük north nung Tuareg-i aniba teloki mapang talangka timtem agüja arudar.

2020 aser 2021 küm military-i sorkar atsüingba sülen Bamako-i, France den tesendaktep kecha mayutsü telemtetba agiogo aser linük nung France nung sepai aser United Nations peacekeeping missions mintokogo.

(Maneni tapak 8 nung...)

## UNGER SENSO TELONGJEM ALICHEN, MOKOKCHUNG: NAGALAND TENÜNGSANG AGÜTSÜR

Wb. Takutemjen aser Wt. Chubaangla-er jala Imnayangla, NBSE (HSLC) Exam-2026 St. Mary Residential School Alichen nungi tematiba jenjang 8(b) nung pass süa School aser Unger Senso nem takok tenüng tajung bentsür aruba asoshi Unger Senso Telongjem Alichen-i la tang kanga pelar aser konang tetushi agütsür.

Asen Teyanglur Tsüngremi ano maneni tarutsü nung la mapa nung moaja len aniang ta sarasademtsür.



Sd/- Shilukaba, President

## MULUNGNEN O



Onoki meima aliba obala asür **LEPSAMAYANG LONGCHAR** (Waromung), ajungbena 22nd April 2026 iba lima nungi pila or onok mangyim tejashi tia nung alidang kija, kibong, kiyonger, kinunger, medemertem, lokti balala, ana aser talang nung alir shirnokisa aria bilemja sarasadem, nübu aser rongsen ajanga yaritepogo, nenok ajak dang kanga pelaba lemsateper. Tsüngremi nenok kija aser kibong maneni moajangma.

- Temeim Chirnur, Semchisemnur & Rapirtem

### LAND FOR SALE

Residential land any size available @450 per sq.ft. Situated at Signal Angami and Thahekhu boundary. 5 minutes walk from Livingstone School, next to St. Vincent Angel Home and CM fathers Seminary. No land fill required. Plot ready for building directly.

Approach road from both Signal Angami and Thahekhu  
Ph. No. 9089970912 / 9233794855

70	122	46	78	100
SOLD	127	55	98	98
112	30	120	73	(8)
55	119	60	60	55
60	(4)	64	43	43
117	67	50	60	55
55	(18)	53	(3)	53
65	50	50	50	50
50	60	(17)	57	40
60	50	62	50	60
50	72	60	72	60
SOLD	72	60	60	60
50	77	76	110	110
SOLD	RESERVED	60	50	RESERVED
		50	60	

**C-Edge College**  
COLLEGE OF ARTS & MANAGEMENT

P.O. Box - 250, Naga United Village Chümoukedima - 797 103, Nagaland.

## ADMISSION OPEN

FREE ADMISSION FOR TOP 10    FREE STUDENTSHIPS AVAILABLE

COURSES OFFERED

Bachelor in Arts (BA) | Bachelor in Business Administration (BBA)  
Japanese Language | Basic Computer Course (BCC)

VAC IN CANAAN FARMERS SPIRIT

**BA**

- Psychology • English
- Sociology • History • Economics
- Education • Political Science
- SEC in English Communication Skills

**BBA**

- Marketing • Finance • Human Resource
- Entrepreneurship Development
- Industrial Training

**PERSONAL GROWTH**

- Public Speaking • Leadership
- Training on Emergency Healthcare
- Job Interview Training
- Language Skills • The Entrepreneur

**ACTIVITIES FOR BBA**

- Seminar • Workshop • Internship
- Field Trip • Industrial Visit
- Business Conclave • Business Quiz & more

+91 80955 45698  
87980 65048 | 89749 84799  
c.edge.college@gmail.com  
www.cedgecollege.org

**ONLINE ADMISSION!**  
www.cedgecollege.org/web/online-admissions

**Bus Service Available**

# CHRISTIAN HIGHER SECONDARY SCHOOL

IN LOVE AND TRUTH WE STRIVE

NYAMO LOTH ROAD, DIMAPUR - 797112, NAGALAND

E-mail: christian.dimapur@gmail.com

Website: www.chssdimapur.com

*Building your child's future and career*

## ADMISSION FORMS FOR CLASS II ARTS & COMMERCE 2026 AVAILABLE

- **Direct admission** for meritorious students starts on 25/04/2026 on first come first basis.
- **Last date for form submission : 04/05/2026** for those requiring entrance test.

**Contact: 9862835655**

## Estevao yiruba sülen World Cup asayatsü mejangja kümogo



Taoba hopta Manchester United den goal 1-0 agi makokba asaya nung hamstring yiruba sülen Brazil nunger asayar Estevao World Cup asayatetsü masayatetsü mejangjai kümogo

**Rongchii/April 25, 2026 (Agencies):** Brazil aser Chelsea forward Estevao hamstring yiruba ajanga tang asaya aliba season nung tanungba asayatem masayatetsüsa akümbe sülen pa World Cup asayatetsü masayatetsü mejangja kümogo.

Chelsea interim coach Calum McFarlanei, Estevao ya koba mapa tashi nung taneptsü angutsü iba indang osang tejangja magütsü. Pa taoba hopta Manchester United den asayaba mapang asaya mezüngbuba shilem nung yirua liasü.

"Estevao mapang tatsükabo masayatetsü, anungji pa tang asaya aliba season nungbo onok atema masayatetsü. Pa ama sempet tajung aketba aser lanur asayar ka atema iba ya kanga

tia maka lir," ta McFarlane-i ashi. "Pa World Cup asayatsü atemabokanga imla alitsü, saka iba indangjibo ni kecha mejangja," ta paisa shisem.

Taküm World Cup ya June 11 nü tenzüksü aser Brazil team mezüngbuba asaya New York/New Jersey Stadium nung June 13 nü Morocco den asayatsü.

Arishi küm 19 tain Estevao ya Stamford Bridge nung goal 1-0 agi makokba asaya nung minute 16buba nung anitet aser Mongolbarnü nü Brighton nung goal 3-0 agi tamakok anguba asaya nunga masayatet.

Taoba coach Liam Rosenior-i taoba hopta ashiba agi, Estevao ya yirur anitetba sülen temulung raksa liasü. Hamstring yiruba ya aneptsü asoshi hopta aika agir aser


kanga mejungi yirura ita aika agir.

Estevao ya taoba küm Palmeiras nungi Chelsea nung aden aser tang asaya aliba season nung goal ti idaktsür lir. Taoba international asaya trok nung goal pongu idaktsüba sülen pa ya United States, Canada aser Mexico nung asayatsü aliba World Cup nung Carlo Ancelotti indang squad nung züngoksemsü imla liasü.

Pa yiruba ya Brazil asoshi takoksa tulu asütsü, kechiyong Real Madrid winger Rodrygo-a masayatetsü, shiba ACL aser temekok raksar lir.

Chelsea pur Deobarnü Leeds den FA Cup semifinals asayatsü lir. Cole Palmer aser Joao Pedro na tang yirur lir, saka tena iba asaya nungbo asayatsü imlar.

## Carlos Alcaraz taküm French Open masayatetsü



Carlos Alcaraz

**Rongchii/April 25, 2026 (Agencies):** Grand Slam tenetben koker aliba asayar Carlos Alcaraz-i ashiba agi, pa tekanük yiruba ajanga taruba French Open nung masayatetsü. Pa kasa timtem ajanga taoba hopta Barcelona Open nunga masayateti liasü.

Arishi küm 22 tain Alcaraz, shiba teka nung timtem aliba asadang liasü, pa Italian Open aser French Open naprongla nung masayatetsü. Asayamung anaprongla ya clay nung asayar.

Alcaraz Barcelona Open nung asaya ka asaya, saka pa Round of 16 asayatsü lia masayatsü asoshi telemtetba agi.

"Kümdangshia alitsü atema

Rome aser Roland Garros nung shilem magitsü telemtetba agiogo," ta Alcaraz-i Instagram ajanga ashi.

"Iba ya kü atema tebenja mapang ka lir, saka iba ya kokteta tashi taitba meyipa arutsü imlar," ta Alcaraz-i ashi.

Arishi küm 22 tain asayar yagi pa Madrid Open nung masayatsü telemtetba agiba April 17 nü sangdonga liasü. Iba mapang pa French Open nunga masayatetsü akok, ta shir liasü.

Alcaraz ya January ita Australian Open akokba sülen Grand Slam ajak akokba asayar tanobusang aküm.

April 12 nü Monte Carlo Masters final nung Jannik Sinner makokba sülen Alcaraz tang

rankings nung tanabuba jenjang nung lir.

Alcaraz ya clay court nung kanga junga asayaba asayar ka lir aser pai 2024 aser 2025 küm Roland Garros kokogo. Taoba küm final nung Sinner den asayaba mapang pai championship points asem tashi kümzüka takok ngua liasü.

Alcaraz-isa, taoba season Monte Carlo, Rome aser Roland Garros nung clay-court title tem benogo aser Barcelona nunga final tonga asaya liasü.

Alcaraz masayaba ajanga Sinner nema Grand Slam pezüprongla akoktsü atema kishi lapoktsüogo. Pai tang tashi nung French Open ya dang mekokteti lir.

## Fan tem nem PSL 2026 final reprangdaksütsü: Mohsin

**Rongchii/April 25, 2026 (Agencies):** Pakistan Cricket Board (PCB) mendenbuba Mohsin Naqvi-i, Pakistan Super League (PSL) 2026 final asaya reprangtsü atema fan tem nem temelaba agütsü ta metetdaksüogo.

Naqvi, shiba linük indang interior minister lir, pai social media ajanga ashiba agi, Ato Kilonser Shehbaz Sharif-i May 3 nü final asaya nung fan tem nem shilem agidaksütsü atema temelaba agütsüogo, koba Lahore nung asayatsü.

2026 PSL season ya terpranger medeni asaya arudar. Middle East nung mepetmesü adoker aliba ajanga totzü jenjang tali akümbe sülen ketdangsürtemi nüburttem senzusenpong aziöktsü asoshi mepeshiba sülen iba asayamung ya kishi shibanga yur asaya arudar.

Tensa mejungi aliba mapang Pakistan sorkari totzü tali

arongba nokdangtsü asoshi lisopurtem dang senzusenpong tali masütsü aser kidangi nungi dang mapa inyaksü tetuyuba agüja liasü.

Naqvi-i ashiba agi, stadium-i fan tem arudaksütsü atema Sharif-ia mulunga lir, saka paisa linük ajunga nung totzü arongba tajemba kümdaksütsü atema inyakyimtem maneni benoka aliba nenshia metetdaksüogo.

Pakistan Super League dak sendakba nung Babar Azam-i aniba Peshawar Zalmi, Multan Sultans aser iba asayamung aseben koker aliba Islamabad United team playoffs atema qualify süatokogo, koba taruba hopta nungi asayatsü.

Kasa mapang nung defend-ing champions Lahore Qalandars, taküm mezüngbuba asayaba Hyderabad Kingmen team aser Karachi Kings nunger playoff nung jenjang pezübuba atema tang toktepa asayaba mapang ka lir.

## India-i 2038 Asian Games atema bid asütsü

**New Delhi, Rongchii/April 25 (Agencies):** 2038 küm Ahmedabad nung Asian Games ayongzüka asayatsü atema India-i bid asütsü, ta linük Olympic committee tekolakbai Honibarnü Reuters news agency dang ashi.

Alima nung nütsünyongsük timtiba linük nung ya Ahmedabad nung 2030 Commonwealth Games ayongzüka asayatsü aser kasa yimti nung 2036 küm Olympic Games ayongzüka asayatsü atema bid südar.

"Indian Olympic Association-i 2038 küm Ahmedabad nung Asian Games ayongzük asayatsü atema tejangraba aliba OCA (Olympic Council of Asia) nem metetdaksüogo," ta IOA tir P. T. Usha-i China nungi phone ajanga Reuters dang ashi.

"Ni idaki OCA tir aser tanga ketdangsürtem den ajurutepogo aser parnok ajak kanga pelar aser parnoki onok nongita yariner," ta lai ashi.

Taoba mapang Olympian Usha ta China kübok Sanya nung Asian Beach Games nung adentsü atema oa lir.

"Parnok idaki EC (executive committee) senden ka menogo aser iba senden nung parnoki iba onük sensaksemogo. Parnoki yakta India-i evaluation committee ka yoktsü," ta laisa shisem.

India nung mezüngbuba Asian Games ya 1951 küm New Delhi nung ayongzüka asaya aser iba sülen 1982 küm linük yimtiba nungsa iba asayamung ayongzüka asaya liasü.

Linük nung 2010 Commonwealth Games ayongzük asayaogo, kong junga achaayang masüba aser ochi mashi inyakyim agi sünga aliba ajanga taitsuba aika ajangshia liasü.

Japan kübok Nagoya nung taküm Asian Games ayongzük asayatsü aser 2030 küm Doha nung aser 2034 küm Riyadh nung iba asayamung ayongzük asayatsü temelaba agütsüogo.

## Mali nung telungpur... (TAPAK 7 NUNGI...)

Taoba küm July ita military ketdangsürtemi coup lenir Goita nem küm pongu atema tir mapa abentsü asoshi temelaba agütsü, koba election magi-i koiben atsülangshiner atsülangshitsü.

Iba masüdag ita ka jelia Russia indang Wagner Group, shirnoki Mali sepaitem nem 2021 küm nungi teyari agüja liasü, parnoki parnok mapa tembanga inyaksü ta ashi. Iba

telok ya Africa indang Corps kümogo, koba Russian Ministry of Defence tazüokba kübok lir.

Burkina Faso aser Niger na den Mali-i 2023 küm Alliance of Sahel States (AES) tentetogo. Linük asemprongla ya army yimsüsüba kübok lir.

Linük asem yagi Sahel tesem nung telungpur telok balala raratsü asoshi joint military battalion ka tentetogo.

## BILEMDANGANG

"Nüsasa na meimtsü tama angazükang."